

Sungovia.
Situs.
Soli fertilitas.

Opida.

SUN govio vel Sunggoia vulgo *Sungow*, ad Septentrionem adhærens Alsatia: ab Ortu Rhenum, ab Occasu Gallia extrematatem attingit: ad Meridiem Helvetia contermina est. Habet multis in locis Vineas, & ubique Frumenti copiam, quod circumquaque in omnes vicinas vehitur regiones, scilicet in Helvetiam, Nigram Silvam, Lotharingiam: atque interdum in remotiores regiones. Complectitur *Sungoia Comitatum Pfirtensem*, cujus ultimus Comes *Vricus* mortuus est Basileæ anno Christi 1514, relictis duabus filiabus, quarum alteram Ioannam nomine, duxit in uxorem Albertus Austria Dux, deditque *Vrsula* Ioannæ uxoris forori, in hæreditatis portionem, octo Marcarum Argenti millia. Dominia, *Befort*, *Morspurg*. Ad Comitatum pertinent hæc loca *Altkilch*, *Dattenriet*, *Befort*, *Rosenfels*, *Maszmunster*, *Thann*, *Senheim*: quæ hodie ab Austria Principibus, in Præfecturas distributa sunt. In *Befort* est collegiata Ecclesia quam Comites Pfirtenses cum *Veldpach* Monasterio virginum (ubi tredecim Comites, & totidem Comitissæ conditæ sunt) fundarunt. In *Maszmunster* insigne est Monasterium Virginum Vestalium, atque aliquot Canonicorum, putant fundatum a Masone Alemannorum Duce a quo vallis illa est appellata *Vallis Masonis* quæ alioquin *Wast* appellatur. *Thannum* elegans est Opidum, ad censeturque Comitatu Pfirtensi. Imminet Opido Arx montana, *Engelburg* appellata, ei adjacet mons *Rang* dictus in quo nobilissimum crescit Vinum *Rangwein* appellatum, Basiliensibus notissimum. Prolabitur ibi ex Montium faucibus fluvius *Thurus*, *Sungoviam* ab Alsatia determinans. *Morsmunster* Monasterium in Comitatu Pfirtensi fundarunt Comites Pfirtenses. *Fanum Amarini* & Arx *Fridberga*, uno milliari a Thanno distans, Abbati Murbacensi parer: non procul inde *Mosella* fluvius oritur. *Mulnhausen* est quoque in Sungovia, Civitas Imperialis, cujus Advocatus sive defensor (sicut & Opidorum *Colmaria* & *Keiserspergi*) Episcopus Argentinenfis anno 1261 fuit, sed paullo post *Rudolphus* Comes *Habsburgensis*, cum *Colmariam* civibus quibusdam contentibus occupasset, & Opidum *Mulnhausen* obtinuit, Arcemque quæ in eo erat (omnibus qui inerant captis) auxilio civium diruit. Electo autem *Rudolpho* in Romanorum Regem, redierunt eadem Opida ad Imperium. Opidanorum studium consistit potissimum in Vini & Frumenti cultura: estque Vinum hujus loci satis celebre. *Otmarsen* Opidum Monasterium habet Virginum, quod tempore *Henrici* quarti construi curavit Comes *Habsburgensis* nomine *Rudolphus*. Hujus frater *Wernherus* Argentinenfis Episcopus, qui *Constantinopoli* in quadam Insula vitam cum morte commutavit. Adhæret *Sungoia* ad Occasum Comitatus *Montis Beligardi*. Habet egregium Opidum *Montisbeligardium*, Arcem Regiam ostentans. Habet & hic Comitatus alia multa Opida & Castra: ut sunt *Grans* Opidum & Castrum. *Klarwang*, Opidum & Castrum, *Passewangum* Opidum cum Arce, quæ omnia Ducum sunt *Wirtembergensium*: utunturque Incolæ lingua *Burgundica*. Comitatu *Montis Beligardi* propinquum est Opidum *Bruntraut*, ubi Episcopus *Basiliensis* in Arce Regia habitat. Atque hæc de Sungovia sufficiant.

Restat